

Riječ Redakcije

Cijenjeni čitatelji !

Povodom sedamdeset godina od održavanja Prvog zasjedanja ZAVNO-BiH-a, Institut za historiju Univerziteta u Sarajevu organizirao je 20. novembra 2013. godine okrugli stol pod naslovom *ZAVNOBiH – pogledi iz nove perspektive*. Domaćin učesnicima skupa bila je Nacionalna i univerzitetska biblioteka Bosne i Hercegovine u Sarajevu. U ovom tematskom broju časopisa predstavljamo vam četrnaest radova s ovog okruglog stola. Sa zadovoljstvom vam preporučujemo pripremljene članke jer oni svojom utemeljenošću, zanimljivošću i pogledom iz nove perspektive osvjetljavaju ove važne događaje iz bosanskohercegovačke povijesti. “Naše podsjećanje na taj događaj više je od pukog sjećanja na jedan historijski događaj. To je, zapravo, podsjećanje na sve nade i ideale, ali i na izgubljene iluzije dvadesetog stoljeća. (...) To je priča o istinama i zabludama, o dobru i zlu, o antifašizmu i fašizmu”, kako je to u svom uvodnom izlaganju istakao prof. dr. Husnija Kamberović, direktor Instituta, na čiju je inicijativu i organiziran ovaj okrugli stol.

U ovom broju *Historijskih traganja* za 2013. godinu, s velikim poštovanjem objavljujemo članak Nedima Rabića o akademiku Marku Šunjiću, povodom petnaest godina od njegove smrti. Obiman rad sa biografskim i bibliografskim podacima uz serioznu ocjenu životnog djela profesora Šunjića, starije čitatelje podsjetit će na uvaženog profesora sa Odsjeka za historiju Filozofskog fakulteta u Sarajevu, a mlađe potaknuti da saznaju mnogo više o znanstveniku koji je dao ogroman doprinos historiografiji srednjovjekovne Bosne, Dalmacije i Evrope.

Nakon ovih kratkih napomena o sadržaju časopisa, srdačno vas pozivamo na suradnju.

Redakcija